

BOIPOLELO BJA TUMELO BJA NEDERLAND

1.

GO NA LE MODIMO O TEE FELA

Ka moka re dumela ka pelo gomme ra ipolela ka melomo, gore go na le boyena bo tee, mme bo molaleng, bja moya bjo re bo bitšago Modimo. Ke yena wa ka mehla le mehla, yo a sa lemošegego, yo a sa bonwego, yo a sa fetogego, yo a se nago bofelo, wa maatlaohle; wa bohlahe bjo bo phethegilego, yo a lokilego, wa botho le wa mothopo wa mokhora, wo o falalago tšohle tše di botse fela.

2.

TŠEO MODIMO A TSEBJAGO KA TŠONA

Re mo tseba ka ditaba tše pedi.

Ya mathomo: Re mo tseba ka tlhoho, tlhokomelo le pušo lefaseng ka moka, ka ge selebaneng sa mahlo a rena go le bjalo ka puku e botse ye mo go yona dibopiwa tšohle, tše kgolo le tše nnyane, e lego ditlhaka tše di re bontšhago gabotse dilo *tše di sa bonwego tša Modimo, e lego maatla a neng le neng le bomodimo bja gagwe*, bjalo ka ge moapostola Paulo re go Barom. 1:20: Dilo tše di lekane go kgodiša batho le go tloša go bona maitshwarelelo ka moka.

Ya bobedi: Modimo o itsebiša go rena le go bonagala go fetiša le ka botlalo bjo bo phethegilego ka Lentšu la gagwe le lekgethwa la bomodimo; e lego gagolo ka mo re ka go hloka ka gona mabapi le bophelo bjo re lego go bjona, gore e be kgodišo go yena le mahlogonolo go bao e lego ba gagwe.

3.

KA LENTŠU LA MODIMO LE LE NGWADILWEGO

Re ipolela gore Lentšu le la Modimo ga le a romelwa goba go *tšweletšwa ka go ithatela ga motho, gobane batho ba bakgethwa ba Modimo ba boletše ba išwa ke Moya o Mokgethwa*, bjalo ka Petro e

mokgethwa a boletše (2 Pet 1:21). Ka morago, Modimo, ka tlhokomelo ye e itšego ya gagwe go rena le go mahlogonolo a rena, o laetše bahlanka ba gagwe, baporofeta le baapostola, go ngwala Lentšu la gagwe le le utolletšwego ka Mangwalo; gomme yena ka boyena o ngwadile molao diphaphathing tše pedi tša mafsika ka monwana wa gagwe. Ka lebaka le Mangwalo a mabjalo re a bitša: Mangwalo a Makgethwa a Modimo.

4.

DIPUKU TŠA SEELO (KANONE) TŠA MANGWALO A MAKGETHWA*

Mangwalo a Makgethwa re a akaretša dipukung tše pedi, ke a Testamente e Tala le e Mpsa. Ke tšona dipuku tša seelo (kanone), tše go se nago se motho a ka go se ganetša go tšona. Palo ya tšona mo kerekeng ya Modimo ke e latelago. *Dipuku tša Testamente e Tala*: Dipuku tše tlhano tša Moše e lego Genesi, Ekisodo, Lefitiko, Numeri, Doiteronomio puku ya Jošua, Baahlodi, Ruthe, dipuku tše Dikoronika (tše di bitšwago paralipomenon)**, Esera, Nehemia, Esitere, Jobo, Dipesalome tša Dafida, dipuku tše tharo tša Salomo e lego Diema, Mmoledi le Sefela sa difela; baporofeta ba bane ba bagolo: Jesaya, Jeremia, Hesekiele le Daniele, le baporofeta ba bangwe ba bannyane ba lesome le metšo e mebedi e lego Hosea, Joele, Amosi, Obadya, Jona, Mika, Nahume, Habakuku, Tsefanya, Hagai, Sakaria le Maleaki.

Testamente e Mpsa: Baebangedi ba bane: Matheo, Mareka, Luka, Johane; Ditiro tša Baapostola; (diepistola) mangwalo a lesome le metšo e mene a moapostola Paulo, e lego go Baroma, mangwalo a mabedi go Bakorinthe, go Bagalatia, go Baefeso go Bafilipi, go Bakolose, a mabedi go Bathesalonika, a mabedi go Timotheo, le go Tito, le go Filemone, Lengwalo go Bahebere; Mangwalo a a šupago a baapsotola ba bangwe, e lego lengwalo la Jakobo, mangwalo a mabedi a Petro, mangwalo a mararo a Johane, lengwalo la Juda; le Kutollo ya Johane.

* *DIPUKU TŠA SEELO (Kanone)* ke dipuku tše di amogetšwego di nepagetše tša Bible, e le seelo sa thuto le bophelo.

** *PARALIPOMENON*: Ditaba tše di ile tša fetwa, eupša di ngwadilwe e le koketšo ya tše di ngwadilwego.

5.

*MO MANGWALO A MAKGETHWA A HWETSAGO TLHOMPHO
LE MAATLA NTSHE*

Tšona dipuku tše fela re di amogela e le tše kgethwa le tša seelo (kanone) le tša motheo wa tumelo ya rena. Ke tšona di e fago maemo le go e tliša. Gomme re dumela tšohle tše di ngwadilwego mo go tšona ka ntle le pelaelo; e se fela ka lebaka la gore Kereke e a di amogela mme e bile e di bona ka mokgwa woo, eupša e le gagolo gobane Moya o Mokgethwa o re hlatsela dipelong tša rena gore di tšwa go Modimo; gape le tšona ka botšona di na le bohlatse bjoo, ka ge difofu le tšona di kgona go phopholetša ka noši gore dilo tše di porofetilwego di a phetagala.

6.

*PHAPANO MAGARENG A DIPUKU TŠA SEELO LE TŠA
APOKRIFA**

Re dira phapano magareng ga dipuku tše, tše kgethwa le tša apokrifa, e lego puku ya boraro le ya bone ya Esera, puku ya Tobia, ya Judithe, puku ya Bohlale, ya Jesu Sirake, ya Baruke, kokeletšo ditiragalong tša Esetere, Thapelo ya bana ba bararo mollong, Ditiragalo tša Susana, le tša seswantšho sa Beli le sa terakone, thapelo ya Manasse le dipuku tše pedi tša Bamakabe.

Kereke e ka bala dipuku tše gomme ya tšea thuto go tšona go fihlela mo di kwanago le dipuku tša seelo; fela ga di na maatla le taelo le ganthane gore ka bohlatse bja tšona go tlišeletšwa karolwana ya tumelo goba ya borapedi bja bokriste. Dipuku tše ga di kgone go fokotša maatla a dipuku tše kgethwa tša seelo.

* APOKRIFA: Ke dipuku tše go sa tsebjego nnete ya tšona gabotse.

7.

*PHETHAGALO YA MANGWALO A MAKGETHWA GO BA
SEELO SE NNOŠI SA TUMELO*

Re dumela gore Mangwalo a a Makgethwa a akaretša thato ya Modimo ka mokgwa wo o phethegilego le gore tšohle tše motho a swanetšego go di dumela go ba le mahlogonolo, di rutwa ka botlalo mo go ona. Mokgwa wo Modimo o swanetšego go direlwa ka wona, o hlalošitšwe mo Mangwalong a ka botlalo. Ka fao ga go a dumelwa

motho le ka o tee go ruta ka mokgwa wo mongwe wa go fapana le wo re šetšego re rutilwe ka wona ke Mangwalo a Makgethwa, le ge e ka ba baapostola *le ge e ka ba morongwa wa legodimong* (Bagal. 1:8-9). Ga go dumelelwa go oketša se sengwe *Lentšung la Modimo goba go tloša se sengwe* (Doit. 12:32; Diema 30:6; Kut. 22: 18-19). Ka baka le go kwala gabotse gore thuto ya Lentšu la Modimo e phethegile ka botlalo. Gomme go se ke gwa ba mangwalo a batho, le ge e ka ba ba bakgethwa bjang, a kago lehangwa le Mangwalo a Modimo; goba mekgwa e ka swantšhwago le therešo ya Modimo, gobane therešo e godimo ga tšohle. Le tše di latelago ga di a dumelelwa go lehangwa le therešo: lešaba le legolo, bokgale tihatlamano ya mabaka goba ya batho, goba ditaolo le ditlamo tša dikopano tša kereke (Ps. 116:11); gobane bana ba batho ke lefelafela; barwa ba batho ka maaka (Ps. 62:9). Ka lebaka leo re lahla tše di sa kwanego le taolo ye ya kgonthe ka palo ka moka, bjalo ka ge baapostola ba re ruta ba re: *Sa lena a e be go lekola meoya gore le bone ge e tšwa go Modimo* (1 Joh. 4:1). Gape: *Ge e mongwe a etla go lena mme a sa tliše thuto ye, se mo amogeleng ka gae* (2 Joh. 1:10).

8.

BORAROBOTEE BJO BOKGETHWA BJA MODIMO

Go ya ka therešo ye ya Lentšu le la Modimo, re dumela go Modimo o tee yo a lego boyena botee, mo go lego matho* a mararo: mekgwa e meraro ya go ba gona. Ke nnete le ka kgonthe le go tloga bosafeleng di fapane ka dimelo tša tšona tše di sa abelanwego: e lego Tate le Morwa le Moya o Mokgethwa. Tate ke mohlagiši le mathomo a dilo tšohle tše di bonwago le tše di sa bonwego. Morwa ke Lentšu, Bohlale le Seswantšho sa Tate. Moya o Mokgethwa ke maatla a sa felego le borena bjo bo tšwago go Tate le go Morwa.

Gape gore phapano ye e tle e se ke ya hlagiša gore Modimo a arolwe ka dikaralo tše tharo, ka ge Mangwalo a Makgethwa a re ruta gore Tate le Morwa le Moya o Mokgethwa, yo mongwe le yo mongwe wa bona o na le boitaolo bja gagwe a nnoši bjo bo arogantšwego ke dimelo tša gagwe, fela ka mokgwa wa gore matho a mararo e le Modimo o tee.

Bjalo go kwala gabotse gore Tate ga se Morwa, le gore Morwa ga se Tate, gape le gore Moya o Mokgethwa ga se Tate goba Morwa. Matho a kgethologantšwego ka mokgwa wo, ga a aroganywe, gape ga a hlakanywe. Ka gobane Tate ga a ka a amogela sebopego sa nama le Moya o Mokgethwa ga a ka a se amogela, ge e se Morwa fela. Tate ga a

ka a ba ka ntle ga Morwa wa gagwe le Moya o Mokgethwa, ka gobane boraro bja bona ba dula e le ba tee ka mehla bomodimong bja bona. Ga go na wa pele le wa mafelelo, ka gobane boraro bja bona ke botee ka therešo le ka borena le ka botho le ka kgaugelo.

* Mantšu á “botho” le “matho” a šomišwa bakeng sa mantšu a Sefrikaanse “persoon” le “persone”.

9.

BOHLATSE BJA MANGWALO A MAKGETHWA MABAPI LE BORARO BJA MATHO GO MODIMO O TEE

Tšeo ka moka re di tseba ka bohlatse bja Mangwalo a Makgethwa le ka ditiro tša matho gagolo ka tšeo re di kwago ka maikutlo a rena.

Bohlatse bja Mangwalo a Makgethwa ao a re rutago go dumela go Boraro bjo bokgethwa, bo hlathollwa mafelong a mantši mo Testamenteng e Tala mo re sa hlwego re latišiša, eupša a swanetšwe go ntšhwa ka kgethologanyo goba ka kelello fela. Go Genesi 1:26,27 Modimo o re: *A re direng motho ka go swantšha ka rena, a swane le rena...Ke mo Modimo a bopilego motho, a mmopa ka go itshwantšha, a mmopa ka go swantšha ka yena Modimo; a ba bopa monna le mosadi.* Gape go Genesi 3:22: *Bjale Morena Modimo a re: Šidi ge! Bjale motho o bile bjalo ka e mongwe wa rena.* Go bonala gabotse gona mo gore se botho ka botee mo Bomodimong ge a re: A re direng motho ka go swantšha ka rena, gomme ka morago ga mo, a laetša botee ge a re: Modimo o bopile. Ka kgonthe ga a bolele gore ke matho a makae, eupša seo re sa se kwišišego Testamenteng e Tala se kwala gabotse go e Mpsha.

Gobane go Morena wa rena a kolobeditšwe nokeng ya Jordane, go kgwagetše lentšu la Tate le le tšwago legodimong le re: *Yena yo ke Morwa wa ka e a rategago (Mat. 3:17).* Morwa o bonwe a le ka meetseng; gomme Moya o Mokgethwa wa iponagatša ka boyena ka sebopego sa leeba; gape Kriste o laetše gore badumedi ba kolobetšwe ka mantšu a: *Yang le dire ditšhaba ka moka barutiwa ka go ba kolobetša leineng la Tate le la Morwa le la Moya o Mokgethwa (Mat. 28:19).* Ebangeding ya Luka morongwa Gabriele o bolela le Maria mmago Jesu ka mokgwa wo: *Moya o Mokgethwa o tla theogela go wena me maatla a Yogodimodimo a tla go okamela wa moriti; ke gona se sekgethwa sa go belegwa ke wena se tlogo bitšwa Morwa wa Modimo (Luk. 1:35).* Go ngwadilwe gore: *Kgaugelo ya Morena Jesu Kriste, le lerato la Modimo, le kopano ya*

Moya o Mokgethwa, a di be le lena ka moka (2 Bakor. 13:13). Gape: Dihlatse tša kwa magodimong ke tše tharo; Ke Tata wešo, le yena Lentšu le Moya o Mokgethwa. Gomme ba bararo ba ke batee (I Joh. 5:7). Ditemaneng tše ka moka re rutwa ka botlalo gore go matho a mararo mo boyeneng bja Modimo bo tee fela. Le ge e le gore thuto ye e ka godimo kudu ga tlhaologanyo ya motho, re e dumela bjale ka baka la Lentšu, ka kholofelo ya gore tsebo ye e phethegilego le kenywa ya yona re tlo e hwetša kua legodimong.

Gape go swanetše go hlokomelwa mediro ye e itšego le ditiro tša matho a a mararo mabapi le rena: Tate o bitšwa Mmopi wa rena ka maatla a gagwe; Morwa yena ke mohlogonolofatši le mophološi wa rena ka go dula dipelong tše rena.

Thuto ye ya Boraro-Botee bjo bokgethwa e tšwetšwa pele ka mehla ka go lotwa kerekeng ya mehleng ya baapostola go fihlela lehono kgahlanong le thuto ya Ba-Juda, Ba-Mohammete le Bakriste ba bangwe ba maaka le bakgelofi bjalo ka Markion, Mani, Prakseas, Sabelliose, Samosatenose, Ariose le ba bangwe ba ba bjalo, ba ba ahlotšwego ka tshwanelo ke baetapele ba kereke ya kgale. Ka fao mo tabeng ye re amogela maipolelo a mararo e lego bja baapostola, bja Nisea le bja Atanasio gammogo le ditlamo tše di dirilwego ke baetapele ba kgale tše di kwanago le ona.

10.

BOMODIMO BJA JESU KRISTE

Re dumela gore Jesu Kriste ka tlhago ya Bomodimo bja gagwe ke Morwa yo a tswetšwego a nnoši wa Modimo. O tswetšwe go tloga go se nago mathomo; ga a dirwa, ga a bopša – gobane ge go ka be go le bjalo, e be e tla ba sebopiwa – eupša ke bomodimo bo tee le Tate e a nago le yena ka mehla. Yena ke leswao la bomodimo bja Tate le phadimo ya *letago la gagwe* (Baheb. 1:3; Bafil. 2:6), dilong ka moka o lekana le Tatagwe. Ke Morwa wa Modimo e sego fela go tlogela lebakeng leo a go amogela tlhago ya rena batho, eupša ke go tloga mehleng e se nago mathomo. Ditemana tše di latelago di re ruta bjalo, ge di bapišwa: Moše o re Modimo o hloedile lefase. Johane yo mokgethwa o re dilo tšohle di hloedile ke Lentšu le a le bitšago Modimo (Gen. 1:1; Joh. 1:3). Moapostola o re Modimo o dirile lefase ka Morwa wa gagwe; gape le gore Modimo o dirile lefase ka Morwa wa gagwe; gape le gore Modimo o hloedile dilo tšohle ka Jesu Kriste (Baheb. 1:2; Bakol. 1:16). Gomme ka

lebaka leo yena yo a bitšwago Modimo, Lentšu, Morwa le Jesu Kriste o be a šetše a le gona, ge dilo tšohle di hlolwa ke yena. Ka fao moporofeta Mika a re: *Tlhago ya gagwe ke ya bogolo-golo bja neng le neng* (Mika 5:1). Gomme moapostola o re: *Ga a na mathomo le mafelelo* (Baheb. 7:3). Ka mokgwa o bjalo ke yena Modimo wa therešo le wa neng le neng, yo maatla ohle, yo re mmitšago, re mo khunamelago, re mo direlago.

11.

BOMODIMO BJA MOYA O MOKGETHWA

Re a dumela e bile re a ipolela gore Moya o Mokgethwa o tšwa go Tate le Morwa go tloga go se nago mathomo. Ga a hlolwa goba go belegwa, goba go dirwa, eupša o ntse a etšwa go bona ba babedi. Ka go latelana, yena ke botho bja boraro bja Borarobotee. O na le boyena botee bjo bo swanago le borena bjo bo nago le letago bjalo ka Tate le Morwa. Ka therešo ke Modimo wa neng le neng ka kgonthe bjalo ka ge Mangwalo a Makgethwa a re ruta.

12.

TLHÔLO YA DILO TŠOHLE, GAGOLO YA BARONGWA

Re dumela gore Tate ka Lentšu la gagwe, e lego ka Morwa wa gagwe, o hlodile legodimo le lefase le dibopiwa ka moka ka se se sego gona ka mo a ratilego ka gona. Gomme o file sebopiwa se sengwe le se sengwe boyena le sebopego le semelo le mošomo ye e fapafapanego gore se direle Mmopi wa sona. Le gore ka moka ga tšona a di hlokomele a di buše ka tlhokomelo ya gagwe ya neng le neng le ka maatla a gagwe a sa felego, le go direla motho gore motho a tle a direle Modimo wa gagwe.

O dirile barongwa gabotse gore e be baromiwa ba gagwe le go direla bakgethwa ba gagwe. Ba bangwe barongwa ba, ba lahlegetšwe ke bothakga bjo Modimo a go ba bopa ka bjona, ba wela tshenyegong ye e sa felego. Ke bona ba ba fetogilego go ba Diabolo le meoya e mebe. Barongwa ba bangwe, ka kgaugelo ya Modimo, ba ile ba kgotlelela le go ema seemong sa bona sa pele. Diabolo le meoya e mebe gammogo ba senyegile me ya ba manaba a Modimo le a tšohle tše di lokilego. Bjalo ka babolai, ka maatla a bona ka moka ba laletše kereke le setho se sengwe le se sengwe gore ba tle ba senye, ba fediše tšohle ka bofora bja bona. Ka lebaka la bomadimabe bja bona, ba ahlolwa go iša tshenyegong ye e se nago bofelo gomme ba letetše tihokofatšo e šoro ka tšatši le lengwe le le

lengwe. Gape re a ganetsa, e bile re nyatša bokgelogi bja Basadusei ba ba ganetšago gore go na le meoya le barongwa; gape re ganetša bjona bokgelogi bja ba-Mani ba ba rego bodiabolo ke ba babe ka baka la tlhago ya bona, e sego ka gobane ba ile ba senyega ka morago.

13.

TLHOKOMELO YA MODIMO LE PUŠO YA GAGWE DILONG TŠOHLE

Re a dumela gore Modimo wa go loka, ka morago ga go hlola tšohle, ga a ka a di tlogela di le bjalo goba a di gafela sewelo goba mahlatshe. Eupša o rata go di sepediša le go di buša ka thato e kgethwa ya gagwe ka mokgwa wa gore mo lefaseng le, go se direge selo ka ntle ga taolo ya gagwe. Modimo le gatee ga se modiriši wa dibe gape ga se yena mong wa molato wa dibe tše di dirwago. Ka gobane maatla a gagwe le botse bja gagwe ke tše kgolo kudu mo re šitwago go di akanya, ka ge a kgona go laola modiri wa gagwe ka bothakga le ka toko, le ge bōdiabolo le ba-ila-modimo ba dira ka mokgwa wo o sa lokago.

Mabapi le dilo tšohle tše a di dirago di phagamile go feta tlhaologanyo ya motho, ga re rate go di nyakišiša ka mokgwa wa bohwirihwiri, ka ge tlhaolaganyo ya rena e šitwa ke go di swara, eupša re reta maikemišetšo a a go loka a Modimo ao a re utamišeditšego ona. Re a reta ka boikokobetšo bjohle bja rena le ka tlhompho. Gomme ka tšona re a kgotsofala ka gore re le barutiwa ba Kriste, ge fela re ithuta seo a re laetšago sona ka Lentšu la gagwe ka ntle le go sela mellwane ye.

Thuto ye e re fa khomotšo ye re šitwago go e laodiša ge re rutwa ka gore ga go selo se se kago re tlela ka sewelo ge e se fela ka thulaganyo ya Tate wa kagugelo wa magodimong, yo a re dišago ka tlhokomelo ya botswadi. Me o buša dibopiwa ka moka tše di lego ka lefase ga taolo ya gagwe bjalo ka ge go thwe: *le e tee ya diphorogohlo e ka se wele fase go sego Tata weno. Ešita le meriri ya lena e badilwe ka moka. (Mat. 10:29,30).* Ke moo re kgotsofalago ka gona, gobane re tseba gore bodiabolo ba swerwe ka mogala gammogo le manaba a rena ohle, ba ka se ke ba kgona go re dira bošula ka ntle ga tumelelo le thato ya gagwe. Mabapi le taba ye re lahlela kgelogi bjo bo šišimošago bja ba-Epikure ba ba rego Modimo ga a itapiše ka selo gomme dilo tšohle o di gafetše matleng a sewelo.

**TLHÔLO LE GO WA GA MOTHO LE GO ŠITWA GA GAGWE GO
DIRA TŠE BOTSE**

Re dumela gore Modimo o bopile motho ka lerole la lefase. Gomme o mo dirile a mmopa ka seswantšho sa gagwe le ka tekanyo ya gagwe e le yo botse, yo a lokilego, yo mokgethwa, yo a kgonago go kwana le thato ya gagwe mo dilong tšohle le thato ya Modimo. *Ge a sa fela a hlomphega o be a sa kwišiše* a bile a sa lemoge bophagamo bja gagwe, eupša ka go rata ga gagwe a ineela sebe ka boyena, me a ineela lehu le thogako ka go theetša lentšu la diabolo. Gobane molao wa bophelo wo a o amogetšego, o o tlotše, me ka dibe a ikaroganya le Modimo wa gagwe, yo e lego bophelo bja nnete bja gagwe, a itlišetša tshenyego tlhagong yohle ya gagwe. Ka lebaka leo o itiretše molato wa lehu nameng le moyeng. Ge e le mo-ila-modimo le yo a fošagetšego le yo bokgopo mo ditseleng tšohle tša gagwe, o lahlegetšwe ke dimpho tšela tše bohlokwa a go di fiwa ke Modimo. Ga go sa šetše selo sa tšona ge e se fela mašaledi ao a lekanego fela go tloša seo motho a itsholago ka sona. Seetša se se lego mo go rena se fetošitšwe lefsifisi, bjalo ka ge Mangwalo a re ruta ge a re: *Seetša se bonega lefsifising fela lefsifisi ga la ka la se tima*. Ke ka mo Johane e mokgethwa a bitšago batho lefsifisi (Joh 1:5). Ka lebaka leo re lahla tšohle tše di fapanego le thuto ye mabapi le boithatelo bja motho, gobane motho ke lekgoba la sebe mme a ka se ke a tšea selo a sa ka a se fiwa se etšwa *legodimong*. (Joh. 3:27). Gobane ke mang yo a kago itumiša gore o kgona go itirela selo ka boyena se se botse, mola Kriste a re: *Ga go motho yo a kgonago go tla go Nna ge a sa gogwe ke Tate e a nthomilego?* (Joh. 6:44). Ke mang yo a ka go ikgantšha ge a kwišiša gore *keleletšo ya batho ke bonaba go Modimo?* (Barom. 8:7). Ke mang yo a tlo go bolela ka tsebo ya gagwe ge *motho wa nama a sa amogele tša Moya wa Modimo?* (I Bakor. 2:14). Ka bokopana: Ke mang yo a kago tliša pelaelo ya mohuta wo mongwe, ge a kwišiša gore *e sego gore re ka kgona go gopola selo ka noši eupša go kgona ga rena go etšwa go Modimo* (2 Bakor. 3:5). Ka lebaka leo seo moapostola a se bolelago ke therešo: *Modimo ke yena a dirago tšohle mo go lena, ke yena a le ratišago, me ke yena a le dirišago se se mo kgahlago* (Bafil. 2:13). Ka gobane ga go tlhaologanyo le thato e nngwe ye e kago kwana le tlhaologanyo le thato ya Modimo ge Kriste a sešo a e šoma ka go motho. Seo o re ruta ge a re: Ge le se ne Nna, le ka se ke la kgona selo (Joh. 15:5).

15.

SEBE SA TLHAGO

Re dumela gore ka go se kwe ga Adama sebe sa pele se feteleditšwe melokong yohle ya batho. Ke yona tshenyego ya tlhago yohle, ke sekodi sa leabelwa seo le bana ba bannyane ge ba sa le difarong tša bommabo ba šetšego ba fetetšwe ke sona. Sebe se se hlagiša dibe tše ntši mo mothong, ka ge se le bjalo ka modu mo go yena. Ka fao ke taba ye e befilego ya makgapa pele ga Modimo ka mokgwa wa gore e lekane go ba thogako go meloko yohle ya batho. Le yona kolobetšo ga e kgone go fediša bobbe bjo ka moka, gobane sebe se etšwa ka mehla mo go yona tlhago ya dibe, bjalo ka meetse a a arunyago a etšwa mo mothopong wo mobe. Le ge se sa balelwa go lahlwa go bana ba Modimo, eupša ka kgaugelo le lešoko la gagwe ba a lebalelwa. Modimo ga a lebalele gore ba dule ba ithobaletše sebeng sa bona, eupša e le gore maikutlo a tshenyego ye a dire gore badumedi ba tle ba fegelwe, gore ba hlologele go hunollwa ba tloge mmeleng wo wa lehu (Barom. 7:24). Ka baka le re ganetša bokgelogi bja ba-Pelagiane ba ba rego sebe se ga se tšwe felo ge e se fela ka kekišo.

16.

KGETHO YE E SA FELEGO YA MODIMO

Re dumela gore, batho ka moka ba wetše tshenyegong le tahlegong ka lebaka la sebe sa motho wa pele. Modimo ka boyena a bontšha seo a lego sona e lego lešoko le toko.

Lešoko: Bao a ba kgethilego morerong wa gagwe wo o sa felego le wo o sa fetogego neng le neng, o ba ntšha tshenyegong ye, le go ba phološa. O ba phološa ka botho fela bjo bo lego mo go Jesu Kriste Morena wa rena, ka ntle le tlhokomelo ya mediro ya bona.

Toko: Ba bangwe o ba tlogela tshenyegong moo ba itahletšego ntshe ka bobona.

17.

PUŠETŠO YA MOTHO YO A WELEGO

Re dumela gore Modimo wa rena yo botho, o nyakile motho, ka morago ga ge a šetše a bone gore motho o itahletše tshenyegong nameng le moyeng, me o itirile wa madimabe ka gohle. Yena ka bohlale bja gagwe bjo makatšago le botho bja gagwe, ge a bona motho a tšhaba pele

ga sefahlego sa gagwe ka go roromela, a mo nyaka a mo homotša ka kholofedišo ya gore o tlo mo fa Morwa wa gagwe yo a tlogo belegwa ke mosadi gore a pšhatle hlogo ya noga go mo phološa. (Bagal. 4:4; Gen. 3:15).

18.

GO BA MOTHO GA JESU KRISTE

Re ipolela gore Modimo o phethile kholofedišo ye a go e dira le botatemogolo ka melomo ya baporofeta ba gagwe ba bakgethwa, ka go romela lefaseng motswalawannoši wa gagwe e lego Morwa wa gagwe wa neng le neng ka nako ye e beilwego ke yena. O ile a tšea sebopego sa mohlanka gomme a tla ka seswantšho sa motho (Bafil. 2:7), ka go tšea ka kgonthe tlhago ya motho le phokolo ya gagwe ka moka – ka ntle le dibe – gomme a amogelwa mmeleng wa kgarebe Maria yo a hlogonolo-faditšwego ka maatla a Moya o Mokgethwa ka ntle ga kopano le monna. Gomme ga a ka a tšea tlhago ya motho ka moo e lego go ya ka mmele fela, eupša o amogetše le wona moya wa makgonthe wa motho, gore e be motho wa makgonthe. Gomme ka ge moya le mmele di lahlegile o ile a di tšea bobedi bja tšona go phološa bobedi bja tšona. Ka fao re fapana le kgelogo ya bona Ba-kolobetša-labobedi, ba ba ganetšego gore Kriste o amogetše nama ya bomotho mmeleng wa mmagwe – rena re ipolela gore Kriste e bile nama le madi bjalo ka bana ka moka (Baheb. 2:14); gore yena mabapi le nama ke wa lešika la Dafida (Dit. 2:29,30); a belegwa e le wa nama molokong wa Dafida (Barom. 1:3); kenywa ye e tšwago popelong ya Maria (Luk. 1:42); a tswetšwego ke mosadi (Bagal. 4:4); lehlogedi la Dafida (Jer. 33:15); lehlogedi la medu ya Isai yo a tšwelego lelokong la Juda (Jes. 11:1); setlogolwana sa Ba-Juda ka nama (Baheb. 7:14; Barom. 9:5) yo a tšwelego lelokong la Abrahamama (Baheb. 2:16), ka ge a amogetše leloko la Abrahamama gomme a swana le banababo ka gohle ka ntle ga sebe (Baheb. 4:15); gore ka gona e be yena Emma-nuela wa rena wa makgonthe, ke go re *Modimo o na le rena* (Mat. 1:23).

19.

KOPANYO LE PHAPANO YA DITHLAGO TŠE PEDI TŠA KRISTE BOTHONG BO TEE

Re a dumela gore ka kamogelo ye, botho bja Morwa bo tlemagantšwe mo go se nago karoganyo gomme bo kopantšwe gammogo

30

le tlhago ya motho. Gore ka gona go se be Barwa ba Modimo goba matho a mabedi, eupša e be tlhago tše pedi tše dikopanywago bothong bo tee, fela tlhago ye nngwe le e nngwe e sa tlogele dimelo tše di fapanego tša yona. Bjale ka tlhago ya bomodimo ye e sa kago ya bopša, e se nago mathomo a mehla ya gagwe le bofelo bja bophelo bja gagwe (Baheb. 7:3) gomme ye tlatša legodimo le lefase. Gomme go bjalo le go tlhago ya motho ga e sa lahle dimelo tša yona, eupša ya dula e le sebopiwa se se nago le mathomo a mehla ka tlhago ye e felago gammogo le tšohle tšeo e lego tša mmele wa makgonthe. Le ge e le yena ka tsogo ya gagwe o file bosahweng tlhagong ya motho ya gagwe, anthe ga a ka a fetša therešo ya bomotho bja gagwe bja tlhago, phološo ya rena le tsogo ya rena di tshepile therešo ya mmele wa gagwe. Fela ditlhago tše pedi tše di tlemagantšwe bjalo mo mothong o tee moo di šitwago go aroganywa le lehung la gagwe. Gomme go bile bjalo ge a ehwa seo a se neelago diatleng tša Tatagwe e be e le moya wa makgonthe wa motho wo o tšwelego mmeleng wa gagwe; ge lebaka le tšwela pele tlhago ya bomodimo ya dula e kopane le ya bomotho le ge a šetše a robotše lebitleng. Gomme bomodimo ga bja ka bja tloga go yena bjalo ka ge bo ile bja se ke bja mo tlogela le bonnyaneng bja gagwe, le ge e le gore bo ile bja se utullelwe bjalo ka nakonyana e se e kae fela. Ka lebaka leo re ipolela gore yena ke Modimo wa makgonthe le motho wa makgonthe: Modimo wa makgonthe wa go fenya lehu ka maatla a gagwe, gomme motho wa makgonthe ka ge a kgonne go re hwela ka lebaka la bofokodi bja nama ya gagwe.

20.

TOKO LE KGAUGELO YA MODIMO GO KRISTE

Re a dumela gore Modimo yo a nago le kgaugelo le toko, ye e phethegilego, o romile Morwa go amogela tlhago ye go yona go thomegilego go se kwe gore ka go yona go tle go tlišwe kgotsofalo mme go rwalwe kotlo ya sebe ka matshwenyego le lehu le le šiišago la gagwe. Ka mokgwa wo Modimo o bontshitše toko ya gagwe go morwa wa gagwe ge a mo rwešitše dibe tša rena; gomme a re tšholela kgaugelo le lešoko la gagwe, rena ba melato ba ba swanetšego go lahlega, ka ge a re file Morwa wa gagwe go re hwela lehu ka lerato le le phethegilego; gomme a mo tsoša gore rena re lokafatšwe, gore ka yena re tle re se ke ra hwa re be le bophelo bjo bo sa felego.

31

21.

**TEFELO YA KRISTE GO RENA, E LEGO MOPRISTA E MOGOLO
A NNOŠI**

Re a dumela gore Jesu Kriste ke Moprsta e mogolo wa neng le neng ka maatla a keno ka mokgwa wa Melkisedek (Baheb. 7:1). O ipeile pele ga Tatagwe ka leina la rena go boelanya kgalefo ya gagwe ka tefo yae e tletšego ka go itira sehlabelo koteng ya sefapano, gomme madi a gagwe a bohlokwa a tšholiwa go hlatswa dibe tša rena bjalo ka ge baporofeta ba boletše kgale. Gobane go šetše go ngwadilwe gore: *Kotlo e wetše Morwa wa Modimo godimo, gore re bone khutšo; ra tlelwa ke go fola ka dintho tša gagwe. A išwa tihabong a etša kwanyana a balwa le badiradibe* (Jes 53:5-7,9,12). Gomme a ahlolwa ke Pontio Pilato bjalo ka yo kgopo, le ge a hweditše a se na molato (Luk. 23:14,15). Ka mokgwa wo o ile a bušetša se a šetšego a se tšere; yena Moloki a kwišwa bohloko mmeleng le moyeng wa gagwe, ka lebaka la ba sa lokago (I Pet. 3:18) – A kwa kotlo ye e šiišago ya dibe tša rena. *Dikudumela tša ba bjalo ka marotholodi a madi a rothelago fase* (Luk. 22:44). A goeletša a re: “*Modimo wa ka! Modimo wa ka! O ntlogeletšeng?*” (Mat. 27:46).

Gomme a tlaišwa ka tšeo ka moka gore re lebalelwe dibe. Ka fao re bolela ka tshwanelo le Paulo ge re re ga re tsebe selo “ge e se Kriste, yena Mmapolwa” (I Bakor. 2:2). *Tšeo ka moka ke maudi fela ge re di bapetša le bogolo bja tsebo ya go tseba Jesu Kriste Mong wa rena* (Bafil. 3:8): re hwetša dikhomošo tše ntši mo dinthong tša gagwe gomme ga go sa na le se sengwe seo re sa se nyakago goba re se gopolago gore se ka re boelanya le Modimo ge e se fela *sedimo se tee* se se tliššetšwego gatee se ka sona a *phethilego go bopa bakgehtwa ka botlalo go ya go ile* (Baheb. 10:14).

Gape ke ka lebaka leo morongwa wa Modimo a mmitšago Jesu, ke go re Mophološi, ka ge “*A tlo phološa setšhaba sa gagwe dibeng tša sona*” (Mat. 1:21).

22.

TOKAFATŠO YA RENA KA TUMELO GO JESU KRISTE

Re dumela gore Moya o Mokgethwa o re fa tsebo ya therešo ya sephiri se segolo se. O tukiša tumelo ya makgonthé dipelong tša rena ye e gokarelago Jesu gammogo le moputso wohle wa gagwe. A ba leruo la rena gomme gwa se be selo se sengwe se re ka go se tsoma ka ntle le yena. Go kgonega e nngwe ya ditsela tše pedi: Ka mo go Morena Jesu ga go

tšohle tše re di hlokago go mahlogonolo a rena. Goba ge tšohle di le mo go yena, yo a nago le Jesu Kriste ka tumelo, o na le phološo ka moka ya gagwe.

Go akanya gore Jesu ga a lekana ka botlalo le gore go sa na le se sengwe ka ntle le yena se se nyakegago, e ka ba go roga Modimo gagolo; gobane mo e tlo ba e le gore Jesu Kriste ke Mophološi wa seripagare. Ke ka baka leo re bolelago ka go kwana le Paulo ge a re: ke ka tumelo fela goba ke ka tumelo ka ntle le mediro ge re lokafatšwa (Barom 3:28). Fela ge re bolela ka mokgwa wo o kwalago gabotse: ga re lemoge gore tumelo ka boyona e nnoši e ka re lokafatša, gobane yona ke selo se re akaretšago Kriste ka sona, yena toka ya rena. Jesu Kriste fela ke toka ya rena; o re balela meputso ya gagwe ka moka le mediro ye mekgethwa yeo a re diretšego yona le yeo a e dirilego bakeng sa rena; tumelo ke selo se se re tlamaganyago le yena kopanong le ditirong tša gagwe tša lerato, tše di fetogilego leruo la rena, bjale di lekana go feta gore re lokollwe dibeng tša rena.

23.

TOKAFATSO YA RENA PELE GA MODIMO

Re a dumela gore lehlogonolo la rena le tšwa tebalelong ya dibe tša rena ka lebaka la Jesu Kriste, le gore tokafatšo ya rena pele ga Modimo a akareditšwe gona mo. Dafida le Paulo ba re ruta ka go hlatholla gore phološo ya motho e bile gona ka ge *Modimo a mo lokafadiše ka ntle ga go gopola mediro ya gagwe* (Ps. 32:2, Barom. 4:6). Gomme yena moapostola yo o re: re lokafatšwa ka kgaugelo fela, ka baka la phološo e lego go Jesu Kriste (Barom. 3:24). Ka lebaka leo re itshwareletše ka motheo wo ka mehla mme re fa Modimo tlhomphe ka moka, e bile re ikokobetša pele ga gagwe. Re ipolela gore se re lego sona ke ka ntle ga go gopola se sengwe sa rena goba sa mediro ya rena, eupša re ithekgile mme re khutšitše godimo ga Jesu Kriste, mmapolwa a nnoši, yo e lego wa rena ge fela re dumela go yena. Go lekane go khupetša makgopo ohle a rena le go re fa kholofelo ye ka yona re kgonago go ya go Modimo ka go lokolla matswalo, ka poifo, ka makalo le ka tšhogo. Re se ke ra dira bjalo ka tatago rena wa pele Adama, yo a ilego a ikhupetša ka matlakala a mogo a tšhogile. Ruri, ge re swanetse go bonagala pele ga Modimo, mme ra itshepa goba ra bota sebopiwa se sengwe le ge e ka se sennyane bjang, gona re be re tlo swanela ke go metšwa. Ka fao e mongwe le e mongwe wa rena a bolela bjalo ka Dafida ge a re: *Morena o se tlele go ntshekiša,*

nna molata wa gago, gobane mo go ba ba phelago ga go na e a kago hwetšwa a lokile pele ga gago (Ps. 143:2).

24.

KGETHAFATŠO YA MOTHO LE MEDIRO E MEBOTSE

Re dumela gore tumelo ye ya makgonthe e šomilwe go motho ka go kwa Lentšu la Modimo le tiro ya Moya o Mokgethwa. Tumelo ya tswala motho la bobedi me ya mo dira motho yo mofsa, ya mo sepediša ka bophelo bjo bofsa, ya mo lokolla bokgobeng bja sebe. Ka lebaka leo tumelo ye e lokafatšago motho e ka se tsoge e dirile gore motho a tonye, ge fela a dula a boifa Modimo, a phela bophelo bjo bokgethwa. Ka ntle le tumelo ye, motho a ka se ke a dira selo ka lerato la go rata Modimo, ge e se fela ka lerato la go ithata ka boyena, le ka go boifa tshenyego. Bjalo ga go kgonege gore tumelo ye kgethwa ye e hloke mediro mo mothong, ka ge re sa bolele ka tumelo ya lefela, eupša re bolela ka tumelo ye mangwalo a e bitšago *tumelo ye e dirago ka lerato* (Bagal. 5:6) le le nago le mediro, le le šušumetšago motho go dira modiro wo Modimo a mo laelago ka Lentšu la gagwe. Ge mediro ye e tšwelela modung wo mobotse wa tumelo, e tlo ba ye mebotse le ye e kgahlago Modimo, ka gobane tšeo ka moka di dirilwe tše kgethwa ka kgaugelo ya gagwe. Ka fao ga se tšeo di ka balwago go ka re lokafatša; gobane ke ka tumelo go Kriste ge re lokafatšwa pele ga gore re dire mediro ye mebotse. Ge go se bjalo e be e ka se ke ya ba ye mebotse, bjalo ka ge go sa kgonego gore kenywa ya mohlare e ka ba ye botse ge mohlare ka bowona o se wo mobotse.

Ka mokgwa wo bjalo re dire mediro ye mebotse, fela e se gore re fiwe moputso – gobane ke eng se re kago putswa ka sona? Re eme pele ga Modimo ka molato wa mediro ye mebotse ye re e dirago mme e se yena go rena, ka ge e le *yena yo a dirago tšohle mo go rena, ke yena a re ratišago me ke yena a re dirišago se se mo kgahlago* (Bafil. 2:13). A re hlokomele se se ngwadilwego: *Ge le dirile tšohle tše le di laetšwego, le tle le re: Ga re bahlanka ba selo, gobane re dirile tše re swanetšego go di dira* (Luk. 17:10).

Gape ga re rate go latola gore Modimo o putsa mediro ye mebotse eupša ke ka baka la kgaugelo ya gagwe ge a hlompha dineo tša gagwe. Gape le ge re ka dira mediro ye mebotse, ga re thee phološo ya rena go yona, gobane ga go modiro wo re kago o dira me wa se ke wa tšhilafatšwa ke nama ya rena, ka fao wa lebanwa ke kotlo. Le ge re ka kgona go tliša modiro o tee o botse pele ga Modimo, go lekane gore ka kgopolo e tee ya sebe, Modimo a ka o lahla. Ka mokgwa wo bjalo re tlo

dula re belaela, re eya kwa le kwa re se na tiišo, matswalo a rena a madimabe a ka be a tshwenyega ka mehla, ge e be e se ka baka la moputso wa matshwenyego le lehu la Mophološi yo re ithekilego ka yena.

25.

GO FEDIŠWA GA MELAO YA DI TIRELO TŠA TLWAELO

(Borapeding bja Israele go latelwa ditlwaelo le melao mo ditirelong).

Bjale re dumela gore ka go tla ga Kriste ditirelo le dika tša molao di kgaoditšwe, le gore meriti yohle ya melao e fedile. Ka baka leo tirelo ya meriti gare ga bakriste e swanetše go fedišwa. Le ge go le bjalo go šetše therešo ya ditirelo tše mo go Kriste, yeo di phethagaditšwego ka go yena. Re sa fela re šomiša bohlatse – bjo re bo hwetšago molaong le baporofeteng – gore bo re tiiše ebangeding le gore bo laodiše bophelo bja rena ka tlhompho yohle gore e be go hlompha Modimo go ya ka thato ya gagwe.

26.

KRISTE KE MORAPELEDI WA RENA

Re dumela gore ga re na matseno a go ya go Modimo ge e se fela ka Mmoelanyi le Mmoleledi, Jesu Kriste, Moloki. O ile a ba motho ka baka leo mo go yena go le tlhago ya bomodimo le bomotho, tše di kopantšwego gammogo, gore ka gona motho a tle a kgone go ba le tsela ya go ya go Modimo yo a phagamilego. Ge go se bjalo tsela ye e ka ba e re tswaleletšwe. Mmoelanyi yo Tate a re filego yena magareng a gagwe le rena, ga a swanele go re tšhoša ka baka la bogolo bja gagwe, gore re se ke ra nyaka Mmoelanyi yo mongwe ka mo re ratago ka gona. Ka gobane ga go na yo mongwe legodimong le lefaseng gare ga dibopiwa ka moka yo a re ratago go fetiša Jesu Kriste. Yena yo a le ka lebopo le Modimo a lego ka lona... *A upša a itlhakola a tšea lebopo la mohlanka* Bafil. 2:6,7) *ge a eba yo a swanago le bana babo ka tšohle* (Baheb. 2:17).

Ge bjale re ka nyaka Mmoelanyi yo mongwe yo a kwanago le rena yo a kago re gaugela, re ka hwetša mang yo a ka go re rata go feta yena yo a gafilego bophelo bja gagwe ka baka la rena, *ešita le mola re sa le manaba a gagwe?* (Barom. 5:10) Ge re ka nyaka yo mongwe yo a nago le maatla le bogolo, ke mang yo a ka go ba natšo ge e se fela yo a *dutšego ka letsogong le letona la Tatagwe* (Dit. 7:56; Ps. 110:1) gomme a nago le *maatla ohle legodimong le lefaseng naa?* (Mat. 28:18). Ke mang a kago kwiwa pele ge e se yena Morwa yo a rategago wa Modimo?

35

Bjale ke ka baka la go hloka tshepo ge bošedi bjo bo tšentswe gore batho ba hlomphele ba bakgetha bakeng sa gore ba ba hlomphe. Ka go dira se ba sa kago ba se dira le ge e le go se rata, eupša e le seo ba go se lahla ka phegello le ka go ya ka go lemoga tshwanelo ya bona, bjalo ka ge mangwalo a bona a laetša. Go se ke gwa hlagišwa gore seo ga se sa re swanela, gobane re ka se bee le gatee dithapelo tša rena pele ga Modimo ka baka la tlhomphego ya rena, ge e se fela ka baka la Morena wa rena Jesu Kriste yeo a okametšego dilo ka moka, le ka baka la tlhomphego ya gagwe, yo toka ya gagwe e lego ya rena ka tumelo. Eupša moapostola o rata go tloša poifo ye ya bošilo goba go hloka tshepo ga rena. – Ke ka baka leo a rego: Jesu Kriste a ba e a swanago le bana babo ka tšohle, gore a be wa go ba kwela bohloko, a be Moprista e mogolo e a botegetšego Modimo a kgone go hlatswa setšhaba dibe tša sona. Gobane ka ge yena a tlaišegile a lekwa le ba ba lekwago o kgona go ba twela (Baheb. 2:17,18). Re kgothalešwa gagolo gore re ye go Modimo, moapostola o eketša ka go re: *Ge re na le Moprista e mogolo yo mokaakaa, e a tsenego a fihla moseo wa magodimo, yena Jesu Morwa wa Modimo, a re tlišeng go ipolela ka tumelo. Gobane Moprista e mogolo e lego wa rena, ga se a kago šitwa go re kwela bohloko ge re fokola; ke e a lekitwego mo go tšohle bjalo ka rena; fela, ga a na sebe. Ke gona, a re batameleng re holofetše, re tle madulong ao a kgaugelo, re tle re amogele tšhokelo, re hwetše kgaugelo ya go hlakodišwa lebakeng la gona* (Baheb 4:14-16). Yena moapostola yo o re: *Re na le mafolofolo a go tsena sekgethwakgethweng ka madi a Jesu, a re batameleng ge, ka pelo-tumelo e tletšego* (Baheb. 10:19,22). Gape: *Ge e le Jesu o na le boprista bjo bo sa šielwego e mongwe. ke tšona di mo kgonišago go phološa-moka go phološa bao ba batamelago ka yena, ka ge e le wa go phela neng le neng le go ba rapelela* (Baheb. 7:24,25).

Go sa hlokega eng? Ka gobane Kriste ka boyena o re:

Ke Nna tsela, le therešo le bophelo. Ga go yo a tlogo go Tate ge e se ka Nna (Joh. 14:6). Na re ka hlwa re nyaka mmoleledi yo mongwe bjang, ka ge go kgahla Modimo ge a re file Morwa wa gagwe go ba mmoleledi wa rena! A re se ke ra mo tlogela gomme ra tšea yo mongwe, goba go inyakela yo mongwe ka ntle ga gore re hwetše yena; gobane ge Modimo a re file yena, o tsebile gabotse gore re be re le badiradibe. Go ya ka taelo ya Kriste re rapela Tata wešo wa magodimong ka Kriste Mmoelanyi wa rena a nnoši fela, bjalo ka ge re rutilwe thapelong ya Morena. Ka gona re na le therešo ya gore tšohle tšeo re tlogo di kgopela go Tate ka Leina la gagwe, re tla fiwa tšona (Joh. 4:17; 16:23; 14:13).

KEREKE YA BOKRISTE YA KAKARETŠO

Re a dumela ra be ra ipolela gore go na le kereke e tee ya bohle ye e akaretšago, ye e lego kopano e kgethwa ya bao ba ba dumetšego ka kgonthe go Kriste. Badumedi bao ba lebeletše phološo yohle ya bona go Jesu Kriste, ke ba hlatswitšwego ka madi a gagwe, ba dirwa bakgethwa, ba be ba tiišetšwa ke Moya o Mokgethwa.

Kereke ye e bile gona mathomong a lefase, mme e tlo ba gona go iša mafefelong bjalo ka ge go bonagala gore Kriste ke kgoši ya mehla yohle, yo a ka se kego a hloka setšhaba.

Kereke ye e kgethwa e lotwa ke Modimo, ka fao e šireletšwa kgalsfong ya lefase ka moka. Le ge e le gore ka nako e nngwe e tšere lebaka le letelele e le e nnyane, gomme mahlong a batho e ke e fedile ka ponagalo, bjalo ka lebakeng la kgoši Ahaba le lešoro, Morena o ile *a lota ba dikete tše di šupago, bao matolo a bona a sa kago a khunamela Baali* (Barom. 11:2,4; 12:4; I Dikg. 19:18; Jes. 1:9; Barom. 9:29).

Godimo ga fao kereke ye e kgethwa ga e a bewa felo go gongwe fela, goba go tlemelelwa go batho ba bangwe. Eupša e atile e bile e phatlaladišwe lefaseng ka moka. Gape e tlemagantšwe e bile e kopantšwe ka pelo le ka thato Moyeng o tee ka maatla a tumelo.

MOTHO YO MONGWE LE YO MONGWE O SWANETŠE GO INEELA KEREKENG YA NNETE

Phuthego e kgethwa ke kopano ya bao ba gaugetšwego, gomme ka ntle ga yona ga go kgaugelo (I Pet. 3:20; Joele 2:32). Re dumela gore go se be motho, le o tee le ge e ka ba wa boemo bofe goba tlhompho efe e a swanetšego go ipea ka thoko, le go ikemela ka boyena. Bohle ba swanetše go ineela phuthegong mme e be ditho tša phuthego, e le gore ba tle ba boloke botee bja kereke. Ba ithôbe ka tlase ga thuto le kgalemelo ya kereke; ba obamiše melala ya bona ka tlase ga joko ya Jesu Kriste. Bjalo ka ditho tša mmele o tee, ba swanetše go direlana le banababo bona kagong ya tumelo ya bona go ya ka dimpho tšeo Modimo a neilego e mongwe le e mongwe. Gore taba ye e tle e bolokege ka nnete, ke modiro wa badumedi ka moka go latela Lentšu la Modimo, le gore ba ikaroganye le bao e sego ba kereke. Badumedi ba ineela phuthegong, go gongwe le go gongwe moo Modimo a hlomilego phuthego ya gagwe

ntshe, le ge mebušo goba melao ya babuši e ka ba kgahlanong le seo, goba le ge lehu goba kotlo e nngwe le e nngwe ya mmele e ka ba gona, ka moka bao ba ikaroganyang le kereke ya nnete ba kgahlanong le molao wa Modimo.

29.

MASWAO A KEREKE YA NNETE LE A KEREKE YA BOFORA

Re dumela gore ka mafolofolo le ka tlhokomelo Lentšung la Modimo, go swanetše go bonala gore kereke ya nnete ke efe, ka gobane bakgelogi ka moka bao ba lego gona lefaseng ba ikhupetša ka leina la kereke.

Mo ga re bolele ka bafori bao ba ikopantsego la badumedi ka kerekeng, fela e se ba kereke, le ge ba le gona ka sebele.

Eupša re re mmele wa kereke ya nnete le kopano ya yona e swanetše go hlaolwa dihlopeng tša borapedi tša bofori tšeo di ipitšago gore ke kereke.

Maswao ao re ka tsebago kereke ya nnete ka ona ke a a latelago:

1. Ke ge kereke e ruta thuto ye e hlwekilego ya ebangedi.
2. Ke ge kereke e diriša disakramente ka mokgwa woo Kriste a di hlomilego ka wona.
3. Ke ge tayo ya kereke e šomišwa go ôtla dibe.

Ka boripana ke go re ge ka moka ba phela go ya ka Lentšu le le hlwekilego la Modimo, ba lahla tšohle tšeo di lwantšhago Lentšu, mme ba amogela Jesu Kriste e le yena fela Hlogo ya Kereke. Ka tše, go ka tse-bja yeo e lego kereke ya nnete, gomme ga go yo a nago le tokologo ya go ikaroganya le yona.

Bao e lego ba kereke bona ba ka tsebja ka maswao a bakriste, e lego: tumelo; le gore ge ba šetše ba amogetše Jesu Kriste bjalo ka Mophološi a le nnoši wa bona; ba tšhabe dibe gomme ba phegelele toka; ba rate Modimo wa nnete le batho ba bangwe: mme ba se ke ba arogela ka le-tsoogong le letona goba le letshadi; ba bapole tlhago ya kgale ya bona le mediro ya yona. Go realo e se gore ga go sa le bofokodi go bona, eupša ba lwantšhe bofokodi bjo ka Moya matšatšing ohle a bophelo bja bona. Ba kgone go dira bjalo ka go tšhabela ka mehla mading, lehung, ditlaišegong le boikokobetšong bja Morena Jesu. Ke ka go dumela go yena ba hweditšego tebalelo ya dibe tša bona.

Ge e le kereke ya bofora e dira e ka yona le ditaello tša yona e na le maatla a go feta Lentšu la Modimo. E bile ga e rate go ikokobetša ka tlase ga

joko ya Kriste. Yona e šomiša disakramente e sego ka mokgwa wo Kriste a di hlomilego ka wona go ya ka Lentšu la gagwe. Yona e fokotša mola, ya oketša mola ka mokgwa woo e ratago ka wona. Kereke ye e ithekgile kudu ka batho e sego ka Kriste, e tšaiša bao ba ba phelago ka bokgethwa go ya ka Lentšu la Modimo, le bao ba kgalemelago diphošo, le megabaru le medimo e šele. Kereke tše pedi tše di ka tsebja gabotse mme di ka hlaolwa gabotse.

30

PUŠO YA KEREKE

Re dumela gore kereke ye ya nnete e swanetše go laolwa go ya ka mekgwa ya taolo ya semoya ye Morena wa rena a re rutilego Lentšung la gagwe. Ke gore go swanetše go ba le badiredi ba Lentšu le badiša, ba go bolela Lentšu la Modimo le go aba disakramente; gape go be bagolo le bahlanka bao gammogo le badiša ba bopago lekgotla la kereke; léo ka lona ba bolokago borapedi bjo bo hlwekilego le go hlokomela gore thuto ya nnete e phatlalatšwe gohle, le go kgalemela le go laola ka moya wa sedumedi, bao ba tshelago melao. Ba hlokomele bahloki le bao ba nyamilego mme ba ba homotše, go ya ka moo ba hlokago. Ka tsela ye dilo ka moka ka kerekeng di dirwa ka tshwanelo le ka molao, ge batho ba ba bjalo ba ba tshepagalago ba kgethwa, go ya ka molao wo moapostola Paulo a o filego lengwalong la Timoteo (I Tim. 3).

31

BADIREDI BA LENTŠU, BAGOLO LE BAHLANKA

Re dumela gore badiredi ba Lentšu, bagolo le bahlanka ba swanetše go kgethelwa mediro ya bona ka kgetho ya molao wa kereke. Kgetho yeo e dirwe ka go bitša Leina la Modimo le ka molao, bjalo ka ge Lentšu la Modimo le re ruta. Ka fao e mongwe le e mongwe o swanetše go hlokomela gore a se ke a gapeletšwa go tsena ka mokgwa o sa dumelwego. O swanetše go letele nako yeo ka yona Modimo a tlogo mmitša gore a tle a be le bohlatse bja gore pitšo yeo e tšwa go Morena ka nnete.

Ge e le badiredi ba Lentšu – mo gongwe le mo gongwe moo ba lego gona – ba na le maatla le taolo tše di swanago, gobane ka moka ga bona ke badiredi ba Jesu Kriste, yo e lego mookamedi le Hlogo ya Kereke a le noši.

39

Re re e mongwe le e mongwe o swanetše go hlomphe badiredi ba Lentšu le bagolo ba Kereke ka botlalo ka baka la modiro wo ba o dirago, mme a phele ka khutšo le bona, a se ne pelaelo, moferefere le phapano ka mo go kgonegago. Re swanetše go dira bjalo gore taelo ye kgethwa ya Modimo e se ke ya senywa goba ya nyatšwa.

32.

TLHOPHIŠO LE TAYO YA KEREKE

Bjale re dumela gore go a re hola ge babuši ba kereke ba bea molao ka gare ga bona mme ba o tliša go babalela mmele wa kereke. Le ge go le bjalo, ba swanetše go hlokomela gore ba se ke ba aroga go tšeo Kriste, Morena wa rena a nnoši, a ba beetšego tšona. Ka baka leo re lahla dikgopolo tšohle tša batho le melao ka moka yeo batho ba ka lekago go e tsentšha gore ba direle Modimo ka yona, yeo ka yona matswalo a tlangwago le go gapeletšwa ka tsela efe goba efe.

Ka fao re amogela fela tšeo di ka dirišwago go tšwetša pele le go boloka kwano le botee, le go di boloka ka go kwa Modimo. Go phetha tšeo go hlokega go ripša kerekeng le tšohle tšeo di lego mabapi le gona. Go ripša go, go swanetše go dirwa ka go ya ka Lentšu la Modimo.

33.

DISAKRAMENTE

Re dumela gore, ka go bona bošilo le bofokodi bja rena, Modimo wa rena yo a lokilego o re beakanyeditše disakramente. O dirile bjalo go tlišetša dikholofetšo tša gagwe go rena, le gore e be ditšhupo tša thato ya gagwe ya go loka, le tša kgaugelo ya Modimo go rena, le go fepa tumelo ya rena. Seo o se okeditše Lentšung la ebangedi go re swantšhetša ka go kwa seo a se rutago Lentšung la gagwe, le seo a se dirago ka gare ga pelo tša rena, ka go tlišetša ka tšona bonnete bja phološo yeo a re fago yona.

Gobane tšeo ke ditšhupo tše di bonwago le dikano tša taba yeo e sa bonalego ya ka gare yeo ka yona Modimo a šomago go rena ka maatla a Moya o Mokgethwa. Ka fao ditšhupo tše ga se tša lefeela ka moo re ka rego di ka re fora, gobane nnete ya tšona ke Jesu Kriste. Ka ntle le yena di ka be di le mafeela.

Go feta moo re kgotsofala ka palo ya disakramente tše Jesu Kriste Morena wa rena, a re hlometšego tšona. Ke tše pedi fela: Ke sakramente ya kolobetšo le ya Selalelo se se Kgethwa sa Jesu Kriste.

40

KOLOBETŠO E KGETHWA

Re dumela e bile re ipolela gore *Jesu Kriste ke phetho ya molao* (Barom. 10:4); ka madi a gagwe a a tšholotšwego o fedišitše tšhollo efe goba efe ya madi yeo motho a ka ratago go e dira ka morero wa go inyabela poelano le tshwarelo ya dibe. A fediša lebollo leo le dirwago ka tšhologo ya madi, mme sebakeng sa lona a hloma sakramente ya kolobetšo. Ka yona re amogelwa kerekeng ya Modimo, le go re kgethologanya le ditšhaba tše dingwe le mehuta e šele ya borapedi, go re dira gore re be ba gagwe ka botlalo, le go rwala leswao le sešupo sa gagwe. Gomme seo ke bohlatse bja rena gore yena e tla ba Modimo wa rena le Tata go rena wa kgaugelo, go ya ka mo go sa felego.

Ka fao o laetša gore batho ka moka ba e lego ba Tate ba kolobetšwe *ka Leina la Tate le la Morwa le la Moya o Mokgethwa* (Mat. 28:19), ka meetse a hlwekilego fela. Go tsebiša gore bjalo ka ge meetse a hlatswa tšhila ya mmele ge re tšhelwa ka wona, – ao a bonwago mmeleng wa yo a kolobetšwago ka go fafatšwa; – le madi a Kriste a dira bjalo ka gare moyeng ka mošomo wa Moya o Mokgethwa. A fafatša moya, a o hlwekiša dibeng tša wona, a re tswala la bobedi gore rena bao re lego bana ba kgalefo ya Modimo, re fetoge bana ba gagwe.

Seo ga se direge ka baka la meetse ao re a bonago, eupša se direga ka go fafatšwa ka madi a bohlokwa a Morwa wa Modimo, yo e lego Lewatle le Lehwibidu leo re swanetšego go le tshela gore re phonyokge kgatelelong ya Farao, ke gore Diabolo, mme re tsene lefaseng: le lekgethwa la Kanana la semoya. Ke ka fao badiredi ba Lentšu ba re fago disakramente, tšeo di bonwago; eupša Morena wa rena yena o re fa tšeo di supšago ke disakramente, e lego dimpho le kgaugelo ye e sa bonwego: O hlwatswa meoya ya rena, gore e hlweke ditšhileng le bokgopong ka moka, le go mpshafatša dipelo tša rena le go di tlatša ka khomotšo ka moka; me o re nea bonnete bjo bo tletšego bja go loka ga gagwe bja botate, ešita le gona go re apeša ka motho e mofsa le go apola wa kgale le mešomo ya gagwe ka moka.

Ka fao re dumela gore ge motho a ikemišeditše go tla bophelong bjo bo sa felego, o swanetše go kolobetšwa gatee fela, ka kolobetšo ya nnete fela, ka ntle le gore e boeletšwe, gobane re ka se ke ra tswalwa gabedi mo mmeleng. Eupša kolobetšo ye ga e re hole fela ge meetse a le mo go rena ge re a amogela, eupša bophelong bja rena ka moka a a re hola.

Ka fao re lahla thuto e fosagetšego ya Ba-kolobetša-gape, bao ba sa kgotsofalego ka kolobetšo e tee fela yeo ba e amogetšego gatee. Godimo ga moo e bile ba ahlola le kolobetšo ya bana ba badumedi; mola rena re dumela gore ba kolobetšwe, me ba gatišwe leswao la kgwerano, bjalo ka bana ba Israele bao ba bego ba bolotšwa, go ya ka dikholofetšo tšeo di swanago le tšeo di direlwago bana ba rena. Ka nnete Kriste ga a ka a tšhollela ba bagolo madi a gagwe go feta bana ba badumedi ka moo a tšholotšwego gore ba hlatswiwe ka ona (Bakol. 2:11-12). Ka fao bana le bona ba swanetše go amogela leswao, e le sakramente ya seo Kriste a ba diretšego sona, bjalo ka ge Morena a laetše molaong, gore ba fiwe kabelo ka sakramente ya tšaišo le lehu la Kriste ka pele-pele ka morago ga ge ba tswetšwe, ka go ba direla sehlabelo sa kwana ye e bego e le yona sakramente ye e šupago Jesu Kriste. Gape seo lebollo le bego le se dira setšhabeng sa Bajuda, ke seo kolobetšo e se dirago baneng ba rena. Leo ke lebaka le le dirago gore Paulo e mokgethwa a bitše kolobetšo *lebollo la Kriste* (Bakol. 2:11).

35.

SELALELO SE SE KGETHWA SA MORENA JESU KRISTE

Re a dumela ebile re a ipobola gore Mophološi wa rena, Jesu Kriste o hlomile sakramente ya Selalelo se se Kgethwa go fepa le go thekga bao a ba tswetšego la bobedi, mme a ba tsenya lapeng la gagwe e lego kereke ya gagwe. Me bao ba tswetšwego la bobedi ba na le maphelo a mabedi ka mo go bona: ke bophelo bja mmele bja nakonyana, bjo ba tlilego nabjo tswalong ya bona ya mathomo, bjo batho ka moka ba nago le bjona; bjo bongwe ke bja moya le legodimo, bjo ba bo neetšwego tswalong ya bobedi, yeo e tlogo ka Lentšu la ebangedi, kopanong ya mmele wa Kriste. Bophelo bjo ga se letlotlo la batho ka moka, eupša ke la ba bakgethwa ba Modimo. Ka fao Modimo o re beetše bogobe bja lefase bja mehleng bja go thekga bophelo bja mmele le bja lefase, e bile e le bja batho ka moka bjale ka bjona bophelo.

Eupša go babalela bophelo bja moya le legodimo, bjo e lego bja badumedi, o ba rometše *bogobe bjo phelago, bjo bo theologilego go tšwa legodimong*, e lego *Jesu Kriste* (Joh. 6:41,51). Ke yena a fepago, a babalelago bophelo bja moya bja badumedi, ge a lewa, ke go re o amogelwa ka tumelo ya ba wa rena moyeng. Gore a re fe sešupo sa bogobe bjo bja moya le bja legodimo, Kriste o beile bogobe bja lefase

42

bjo bo bonwago, e lego sakramente ya mmele wa gagwe, le beine go ba sakramente ya madi a gagwe. Re amogela sakramente ka nnete mme ra e swara diatleng tša rena, ra e ja e bile ra e nwa ka melomo, gomme bophelo bja rena bo babalelwa ka yona. Ka mokgwa wo bjalo Kriste o re tsebiša gore ka nnete re amogela mmele wa gagwe ka sebele, le madi a gagwe a nnete, e lego yena Mophološi a nnoši wa rena. Tše re di amogela ka tumelo, ye e lego letsogo le molomo wa meoya ya rena, gore bophelo bja rena bja semoya bo tle bo babalelwe ka tšona. Ka fao ge, ke nnete e bile ga go na pelaelo ya gore Jesu Kriste ga a re laele ka lefela go boloka disakramente. Ka fao ka ditšhupo tše kgethwa tšeo o šoma ka gare ga rena tšohle tše a di ratago gore re tle re di bone. Le ge e le gore dilo tšeo ga re di kwišiše, e bile ga re tsebe gore di direga bjang, bjalo ka ge modiro wa Moya o Mokgethwa o utamile re sa o kwišiše. Ka fao ga re timele ge re re se se jewago ke mmele wa nnete le madi a nnete a Kriste. Fela mokgwa wo re jago mme re nwago ka wona, ga se ka molomo, eupša ke ka moya ka tumelo ya rena.

Ka fao Jesu Kriste yena o dutše ka mehla ka letsogong le letona la Modimo, Tatagwe magodimong; le ge go le bjalo ga a lese go ikabela rena gore re mo amogele ka tumelo. Selalelo se ke tafola ya moya, mo Kriste a ikabelago rena le mo a re fago tšohle tše botse tša gagwe. Ka tafola ye re natefelwa ke yena le ke tšeo a di hweditšego ka ditlaišego le lehu la gagwe. O a fepa, o a matlafatša goba o homotša meoya ya rena ya bodiidi; ye e sa homotšegago. Seo o se dira ka go re leša nama ya gagwe me o a mpshafatša le go tliša meoya ya rena ka go re noša madi a gagwe.

Disakramente di tlakantšwe le taba tšeo tše di di šupago, le ge go le bjalo ga se batho ka moka ba ba di amogelago gammogo le ditaba tšeo tše pedi. Mokgelogi yena o amogela disakramente thogakong ya gagwe, gobane ga a amogele nnete ya sakramente; bjalo ka Judase le Simone wa sedupe bao ba bego ba amogela sakramente, eupša ba sa amogela Kriste yo a swantšhwago ke sakramente le yo a abelwago ba ba dumelago fela.

Sa mafelelo, re amogela sakramente e kgethwa phuthegong ya setšhaba sa Modimo ka boikokobetšo le tlhomphe, me re di amogela ka tebogo ka kgopolo ya lehu la Kriste, Mophološi wa rena, e bile re dira boipolelo bja tumelo ya rena le bja borapedi bja bokriste. Ka fao go se ke gwa ba le motho yeo a e batamelago pele a itlahlafa gabotse, gore ka go ja bogobe bjo le ka go nwela senwelong se, a se ke a tla a ja mmie a ba a nwa kahlolo godimo ga gagwe (I Bakor 11:29). Ka boripana, ka go šomiša sakramente e kgethwa, re tlišwa leratong le tukago mabapi le Modimo le ba bangwe.

Ka fao re ganetša tšohle tšeo di ka hlakanywago le dikgopolo tše di sa amogelwago tšeo batho ba oketšago go disakramente go di goboša. Re bolela gore re swanetša go kgotsofala ka taelo yeo Kriste le baapostola ba gagwe ba re rutilego yona, mme re bolela ka mokgwa wo ba boletšego ka wona.

36.

ODIRO WA MMUŠO

Re dumela gore Modimo wa rena yo a lokilego, o beile dikgoši, matona le mebušo ka baka la bokgopo bja moloko wa batho. Gobane ke thato ya gagwe gore lefase le bušwe ka melao le mebušo; morero e le gore, go dira boithatelo ga batho go tle go gatelelwe mme tšohle di tle di sepele ka molao bathong. Ka morero wo Modimo o neile mmušo tšhoša go ahlola bao ba dirago bobo, le go šireletša badumedi (Barom. 13:4).

Mme modiro wa bona ga se fela go hlokomela pušo ya se legae, eupša le go thekga tirelo-kgethwa ya kereke; go tloša le go tumula bokgelogi le borapedi bja bofora; le go tlapiriganya mmušo wa mo-lwale-Kriste (Antikriste), mme ka go realo go tšweletša pele mmušo wa Jēsu Kriste. Gore Lentšu la ebangedi le bolelwe gohle, morero e le gore Modimo a hlomphe.

O be o direlwe ke motho e mongwe le e mongwe goba ke wa boemo bofe goba lebakeng lefe, o gapeletšwa go ipa ka tlase ga mebušo, go ntšha makgetho, go fa tlhomphe le go ba thaetša le go ba rapelela go Modimo a ba tataiše ditseleng tša bona tšohle *gore re phele khutšong, re iketlile, ka borapedi ka moka le ka tlhomphe* (I Tim. 2:1,2). Ka fao re ganetša Ba-kolobetša-gape le baferekanyi, le bohle bao ba ganago mebušo le babuši, le bao ba ratago go fošetša kgole maatla a mmušo, bao ba ratago ge go ka ba tlhakano ya maruo, e bile ba tliša kgakanego go toka yeo Modimo a e dirilego ka gare ga batho.

37.

KAHLOLO YA MAFELELO

Sa mafelelo, re dumela gore go ya ka Lentšu la Modimo, ge nako yeo e beilwego ke Morena e fihlile, — yeo dibopiwa tšohle di sa e tsebeo

– mme palo ya bakgethwa e tletše, Morena wa rena Jesu Kriste o tlo tla a etšwa legodimong, ka nama e bile a bonagala, bjalo ka ge a bonagetše ge a rotogela legodimong (Dit. 1:11), ka letago la legolo le ka bogoši, go ba moahlodi wa ba ba phelago le ba ba hwilego, mme o tla hlwekiša lefase le la kgale ka mollo le ka kgabo. Batho ka moka ka bobona ba tla ema pele ga Moahlodi yo banna le basadi gammogo le bana, bao go tloga mathomong a lefase go fihlela mafelelong ba ba ilego ba ba gona; o tla ba bitša ka lentšu la morongwa e mogolo, le ka modumo wa phalafala ya Modimo (1 Bathes. 4:16). Gobane ka moka bahu ba tla tsoga mobung, meoya ya bona e tla kopana le mebele ya bona yeo ba bego ba phela ka yona. Ge e le mabapi le bao ba tla go be ba sa phela, bona ba ka se ke ba hwa bjalo ka ba bangwe. Eupša ka ponyo ya leihlo ba tla fetoga; se se hwago sa fetoga go se hwe.

Me dipuku (ke go re mangwalo) di tla bulwa gomme bahu ba tlo ahlolwa go ya ka tšeo ba di dirilego mo lefaseng, e ka ba tše botse goba tše mpe (Kut. 20:12; 2 Bakor. 5:10). *Ka tšatši la kahlolo batho ba tla ikarabela bakeng sa polelo e nngwe le e nngwe ya lefela ye ba e boletšego* (Mat. 12:36) – e lego seo lefase le se bonego e le papadi ya bana le go senya nako. Me diphiri le boikaketši bja batho bo tla bulelwa bohle pepeneng.

Ka fao kgopolo ka ga kahlolo ye, e tšhoša batshedi ba melao le bakgopo kudu; mme go ba boleta le bakgethwa e a kganyogega e bile e tletše khomotšo, gobane phološo ya bona e tletšego e tla phetwa. Me ba tla amogela ditholwana tša modiro wa bona le mahloko ohle ao ba ilego ba a kgotlelela. Go se be molato ga bona go tla dumelwa ke bohle, me ba tla bona bogale bja Modimo bjo bo tšhabegago godimo ga bakgopo, bao ba bego ba ba buša ka bogale e bile ba ba gatelela le go ba tshwenya mo lefaseng. Go ya ka bohlatse bja matswalo a bona, bakgopo ba tla ahlolwa. Ba ka se hwe eupša morero e le gore ba tle ba kwišwe bohloko *mollong wo o sa felego, o lokišeditšwego Diabolo le barongwa ba gagwe* (Mat. 25:41).

Gona moo badumedi le bakgethwa bona ba tla rwešwa mphapahlogo wa letago le tlhompho. Morwa wa Modimo a re: *Ke tla bolela leina la gagwe pele ga Tate wa magodimong le pele ga barongwa ba gagwe* (Mat. 10:32; Kut. 3:5). *Modimo o tlo phumola megokgo ka moka mahlong a bona* (Kut. 21:4); taba ya bona yeo bjale e ahlolwago ke baahlodi ba bantši le mebušo gore ke bokgelogi le go ila Modimo, e tla dumelwa gore ke taba ya Morwa wa Modimo. Bjale ka moputso wa

kgaugelo Morena o tla ba fa tumišo yeo motho ka pelo ya gagwe a ka se kgonego go ka e ekanya.

Ka moo re lebeletše letšatši le legolo ka phišego e kgolo gore re tle re ipshine ka dikholofetšo tša Modimo go Jesu Kriste Morena wa rena.